

余
山

山

集

金山集卷之二

皖桐方 文爾止著

黃州王澤弘吳廬定

壻繡水王 槩安節較

五言古體

廬山詩 壬辰 三十六首

壬辰冬予客南康出北門三里望見一阜自廬山來盤紆道左雖不甚高深而秀色可掬曰玉京山地名上京陶靖節曾居其麓詩云瞻昔家上京六載始還歸太白詩云遙見仙人彩雲裏手把芙蓉朝玉京即此處也

世傳陶徵君起家柴桑里柴桑匪江州實始隸星子當其年少時家貧易遷徙玉京介湖山高入合棲此故宅今有無芳風扇蘭芷 右玉京山

又二里有真武廟即顏家山顏魯公貶吉州別駕時嘗游廬山愛其風土遂買宅於此孫顏翊少孤

有志操率子弟三十餘人受經白鹿洞今祀洞學先賢祠

魯公遷吉州雅好登廬山徘徊不忍去卜居此林間生齒日繁聚故里遂不還厥孫繩乃武高風杳難攀至今南康郭山水俱姓顏右顏家山

又十里至白鹿洞唐李渤與其兄涉讀書洞中馴一白鹿自娛故名南唐昇元中詔建廬山國學于此宋朱子知南康軍卽故址建書院聚徒講學天下宗之先朝胡居仁章潢輩以布衣來主洞事其教大行今洞學洞田遺制未泯而講學者敬矣

周朱二大儒皆爲此州守文公益興學風聲樹江右陸子金陵來懽然執其手微言入無間盛事垂不朽五嶽雖巍峨誰如此淵藪右白鹿洞

又十里爲五老峯懸崖削壁排空插漢如五老人聯肩而立真巨觀也唐李白楊衡符載元稹盧仝皆隱其麓白詩云廬山東南五老峯青天削出金芙蓉九江秀色可攬結吾將此地巢雲松

廬山千萬峯五老爲之最聳肩立雲表峨然有冠蓋昔
賢方與匡修真入煙靄遺跡雖莫考豈出此峯外後人
紛結蘿一一有深會右五老峯

五老峯下有白鶴觀唐道士劉混成所居也蘇子瞻嘗獨游至此觀中人皆閤戶晝寢但聞棋聲于古松流水之間今觀殊荒寂而占松猶存

予瞻居黃州性不耐寂寞時時過江來廬山訪丘壑高
情契五老閒步至白鶴聞棋卽欣然何必苦思索予亦
不解棋亦不惡人著右白鶴觀

又有尋真觀唐女道士蔡尋真所居也尋真蔡侍郎某女與李林甫之女騰空爲友入山修煉皆仙去詔以蔡所居爲尋真觀李所居爲昭德觀太白詩云羨君相門女學道愛神仙素手掬青靄羅衣曳紫煙一往屏風登乘鸞著玉鞭今尋真觀廢爲田惟柱礎存耳昭德觀在卓嶺之東今亦廢

李相非端人乃生騰空女日與蔡尋真相期學狎舉當

時松栢壇今化爲禾黍我來訪遺踪荒煙漫平楚五老雲壑間髮髯有仙侶

右尋真觀

尋真觀東一里有相辭澗即尋真騰空送別之處也故名今訛爲相思澗元集虛嘗隱于此白樂天過訪之詩云溪雲漠漠樹重重水檻山窗次第逢晚葉尚開紅斷腸秋房初結白芙蓉聲來枕上千年鶴影落盃中五老峯更愧慙

勲留客宿魚鮮飯細酒香濃

昭德在澗東尋真在澗西二女時相過到此惜分攜及其飛昇後元生結幽栖江州亦時來嘯咏臨青溪斯人久不作古澗煙榛述

右相辭澗

相辭澗北三里爲麻姑崖又二里爲玉川門兩崖對峙如錢壁萬仞中間巨石無數穿石而上又三里爲三疊泉其水自五老峯左脅流出凡三級如玉龍蜿蜒下垂雪翻霆擊唐宋以前無知者卽朱子鹿洞時亦未及睹旣去始聞之托黃商伯繪圖以寄摩挲愛玩謂之新泉然路甚險峻非好奇者亦罕至焉

瀑布山中多黃巖爲獨絕誰知五老背陰崖復三折昔
人鮮得覩但聞樵者說我今攜山僧直造彼巖穴恨不
隨朱公題詩咏冰雪

右三疊泉

由麻姑崖左折上嶺十里爲屏風疊一日九疊雲
屏卽五老之背俯瞰三疊泉反出其下又四里爲
萬松坪有小徑可上五老峯頂南望彭蠡如指掌
北則乾綱嶺蔽之不能望九江太白云予行天下
所游覽山川甚富俊偉詭特鮮
有能過此者與天下之壯觀也

山下望五峯芙蓉在天半今上五峯頂置身已霄漢所
恨朔風急陰雲復瀰漫望遠若不真山川影相亂來歲
巢雲屏晴空恣遐玩

右九疊雲屏

萬松坪五里至含鄱口含鄱者謂登此嶺而鄱湖
盡見也又五里爲九奇峯九奇者連山嵯峨其峯
有九其二峯尖秀如蒼玉筍是爲上霄峯
昔秦始皇漢武帝司馬子長皆登其巔

九峯信已奇上霄尤詭特壯哉秦漢主不惜攀躋力吾

聞太史公二十遊南國亦登此山椒延頸眺八極嗟彼
山下人終身莫能陟

右上帝峰

上帝之南有漢王峯大小殊壯漢武帝南巡時嘗
登此故名今訛爲漢陽非也大漢王峯爲廬山最
高處雖五老上霄紫霄皆不及焉山頂有方
湖石井其中魚鱉螺蚌之屬莫知所自來

帝王古不乏漢武爲世雄封禪去海岱巡狩來江東鸞
輿升碧巘翠蓋翔遙空方湖感靈異神魚產其中或疑
此山頂下與江湖通

右漢王峯

漢王峯下有康王谷昔楚康王爲秦將王翳所逐
匿此谷中得免故名今人謂之烏龍潭潭左右崖
巖峭有水如簾布崖而下者三十餘派曰
谷簾泉唐陸羽茶經品此爲天下第一

楚子僭稱王漢陽食諸姬卒爲秦所滅遁竄身幾危至
今谷名康轉令識者悲有泉掛蒼崖歷亂銀河垂臨流
試一酌陸生不吾欺

右康王谷

上霄之北有天池山其下天池寺洪武中年所勅
建也昔周顛仙數見明太祖言禪待事及征偽漢
與太軍俱西至湖口辭去入廬山杳然絕蹤矣後
明太祖特有赤脚僧來送藥云天眼尊者周顛仙
人所遣服之立愈問顛仙何在曰在竹林寺竹林
既不可見而其地與天池近因飾天池寺以崇祀
之御製碑文并賜
銅鐘象鼓各一

高皇建人極不樂聞詭秘惟有周顛仙時時與之戲水
火莫能殺去來隨厥意竹林既窈冥天池表神異煌煌
鐘鼓靈千祀永不墜

右天池寺

天池之北有昇仙臺上刻御製周顛仙人傳覆以
亭其東爲佛手岩有盤石突出下臨絕壑潭色沉
沉正黑僧云此竹林寺也有影無形神聖所居風
雨中往往聞鐘梵聲昔天眼尊者與周顛仙命赤
脚僧送藥
卽此處也

竹林在何處有影復無形蒼崖百丈餘下視青冥冥聖
僧於此居顛仙亦時經軫念人主疾饋藥至明廷何以

酬酢之膚藻炳日星

右竹林寺

天池之西文殊寺之南有石門澗後漢地里志所謂廬山西南雙闕是也二石峙立其狀如門飛泉奔瀉為山北衆水之宗每夏霖秋潦轉石發樹聲動數十里謝靈運鮑昭俱有登石門詩

廬山有雙闕漢書亦云然兩崖勢千仞中漚為長川夏

秋水泛溢遠近聲喧闕不聞樵人語但見銀河懸勝情

推謝鮑遺咏何翩翩

右石門澗

山北諸勝已悉其槩復由含鄱下嶺二十里至棲賢寺寺剏自六朝號名剎唐李渤讀書其中當時甚盛今頗凋零尚有玉淵金井棲賢橋皆古跡焉陳舜俞詩云辟蛇行者曾開路扶眼高僧尚有墳龍帶雨歸三峽水鳥御花出五峯雲拭眼即赤眼也

昔賢李賓客兄弟擅時譽

平聲

癖性嗜山水此寺嘗讀書

厥後馴白鹿還歸洞中居玉淵及金井泉壑長自如後

賢豈不多潭上誰結廬

右棲賢寺

樓賢橋之西有水曰西澗宋劉凝之隱于此自號西澗居士歐陽公賦廬山高以贈之李龍眠爲之繪圖作歌今南康城內有水玉澗乃其故居城外有西澗祠乃其墓也

劉公挺直節掛冠隱山麓嘗與寶峯僧往來騎黃犢當時歐黃輩平生罕推轂交口贊公賢私心必誠服祇今澗雖荒尚想人如玉

右西澗

西澗之西有峯曰五乳其下爲五乳寺近代慈山師所建也五乳之上有卧龍潭朱子愛其幽勝作卧龍菴以居而繪武侯像于其中自作記記之今卧龍菴廢惟五乳存耳

文公興鹿洞又復求龍潭愛其巖壑幽端居結茅菴因名思武侯繪像比瞿曇歲久跡泯滅此地空澄嵐借問五乳僧卧龍誰復探

右五乳寺

五乳寺之西南有萬杉寺故慶雲菴也宋景德中僧大超受知仁宗因其手植萬杉故名此寺石刻甚富僧苦于募捐悉踣而瘞之惟宋仁宗國泰清淨四大字槐京包篆龍虎慶嵐四大字尚存

前人種萬杉今無一杉存邦國且滄桑梵刹寧復論唯
有金石字百代永弗謾山僧又瘞之何處求雲根寥寥
遺墨在剝落苔蘚痕

右萬杉寺

萬杉寺之西爲開先寺南唐中主李煜勿從其父
李景從豫章讀書鶴鳴峯下有野夫獻地買之萬
金爲書堂後卽位遂舍爲寺以野夫獻地爲已得
國之祥故名今寺中有青玉峽泉壑極佳又有讀
書臺洗墨池聽明泉黃山谷手書七佛偈碑王陽
明手書千宸濠碑米元章手書青玉峽三字其餘
名墨不可勝數

唐主性遐異萬金買民宅旣貴施爲寺養僧累千百雖
遭兵燹患今制未改昔來遊多名賢往往畱遺跡吾獨
愛文成紀勲在崇石

右開先寺

開先寺後五里爲黃巖巖下二石洞有屋數間曰
空生閣懸崖瀑布如千尺白練夏秋水漲陰風掣
斷飄入半空尤奇南面有文殊臺登臺可以觀瀑
臺後有雙劍峯一指峯香爐峯俱秀太白詩云日

照香爐生紫煙遙看瀑布掛長川飛流直下三千
尺疑是銀河落九天徐凝詩云虛空落泉千仞直
雷奔入江不暫息今古長如匹練垂一條界破青
山色子瞻詩云帝遣銀河一派垂古來惟有謫仙
詞飛流激沫知多少
不與徐凝洗惡詩

三疊泉雖佳鐵壁獐可畏不如黃石巖諸峯秀爲貴飛
泉宛白龍奔走有雲氣豈但洗塵濁亦足醒聾聵我來
何匆匆徘徊復獻欬

右黃巖

開先寺之西爲簡寂觀宋道士陸修靜所居也修靜吳興人隱于廬山屢徵赴闕不就後尸解去謚簡寂先生尚有禮斗石搗藥臼布袋巖在焉今觀殊荒甚惟門前古松十數株猶是晉宋時物

陸子謝榮名修真在絕巘嘗與陶徵士東林訪惠遠三
笑愜同心歸來日已晚青天騎白鶴一去不復返貞松
千歲姿寒雲自舒卷

右簡寂觀

簡寂觀之西卽歸宗寺晉王羲之罷江州日買宅於此有佛馱耶舍尊者自西域來羲之愛其風範

遂舍宅為寺以居之今墨池鵝池尚存元末寺廢於兵盡成瓦礫萬曆間達觀師偶過此見一古松為鄉人所伐將斷師惻然以麥二斛買之自取泥石傳其斧痕且囑曰此松活吾當復興此寺後三年重過此則松愈茂斧痕皆合遂命其徒果清結茅居之四方植信助金數萬贖田構舍頓還舊觀今廬山諸寺以歸宗為冠雖由人力亦其地脉有以致之也

歸宗昉自晉唐宋道益弘中間逢世難殘破無一僧達公偶然過耶舍乃中興雖因願力鉅良以地氣凝試看復生松豈非鬼神憑

右歸宗寺

歸宗寺後最高者曰紫霄峯昔大禹治水時曾登此峯以觀彭蠡因刻百餘字于石室中石室極深險人罕得至有好事者絕而下摹其字出惟洪荒漾干乃捧六字可識今并不知石室所在

夏后勤疏鑿遊歷徧九州及至敷淺原登山眺橫流刻石古洞中雅意垂千秋代久字磨滅洞亦莫可求自非好古者孰肯恣冥搜

右紫霄峯

有水抱紫霄而下者曰鸞溪元豐間真淨文老住
歸宗是時濂溪先生亦解官居廬山黃山谷以書
勸先生與之遊故先生數至歸宗與文老談甚洽
因結青松社以擬白蓮名其寺左之水曰鸞溪以
擬虎溪

元公倡道學實爲諸儒先初不近二氏恐其淆聖賢及
與文老遊始悔從前偏風流慕陶遠結社齊白蓮至今
鸞溪水日夜猶潺湲

右鸞溪

歸宗寺後有玉簾泉雖不及黃巖三疊之奇然黃
巖三疊只可遠觀不得近視此則坐立巖下仰面
看瀑壺霧空濛久之衣冠盡濕山僧
新造一樓于溪上可以恣休息焉

此泉久湮沒後代人始知遠望始匹練近觀如細絲所
以名玉簾谷簾寧勝茲六月且陰寒况乃冰雪時小樓
暖可居他日求一枝

右玉簾泉

玉簾泉之西爲金輪峯昔耶舍尊者在西域夢登
一峯如金輪及至此山如夢所見故名因構佛舍

刊一顆葬于此上造鐵塔鎮之山
僧云晴朗之夜每見舍利放光

耶舍屬賓人妙齡甫十九南遊至匡嶽王公爲屈首施
宅紫霄峯金輪轟其右彷彿夢中山合爲世尊有舍利
小如珠靈光燦星斗右金輪峯

金輪峯之下有杏林昔董奉隱廬山爲人治病不
受錢令種杏一株數年成林杏熟易穀儲以救荒
有多取者虎輒逐之卽此處也
今杏樹俱無惟杏壇菴在耳

董子本神仙施藥不受直人樹杏一株山中樹如織責
令虎收穀出納誰敢忒凶歲以救荒村民飽其德祇今
杏雖凋言者猶嘆息右杏林

杏林之南爲黃龍山山下有栗里昔江州刺史王
弘欲識淵明不能致乃命淵明故人龐通之賁酒
於廬山半道栗里要之卽此是也
栗里之西有柴桑橋卽淵明故居

陶令居柴桑足不履公府刺史亦名流欽慕焉得睹委

曲命所親相要到茅宇俄頃弘白至共醉亦無迂栗里

宛如昨高風渺千古

右栗里

又有醉石在虎爪崖下相傳淵明山遊曾醉卧於此故名顏魯公詩云張良思報韓璧勝恥事新仇擊不肯就舍生悲縉紳嗚呼陶淵明奕葉爲晉臣自以公輔後每懷宗國屯題詩庚子歲自謂羲皇人手持山海經頭戴漉酒巾興逐孤雲外心隨還鳥張朱子跋云此詩雖不得其全篇然讀之者亦可以識二公之心矣

長沙晉公輔厥孫肯仕宋托酒以自晦私衷有深痛片石亦何取曾經宿鸞鳳紛紛來遊者平原爲之誦二公

本同心詩亦相伯仲

右醉石

由柴桑橋三里至隘口則又轉而之山北矣隘口七里至面陽山山下有淵明墓代久湮沒李空同先生來始封識之并復其田地歸陶氏後九江守馬公紀來疏請建祠曰靖節書院著令興德化縣春秋祭之

先生自祭文葬野不封樹豈知千載後巍然祠與墓當時晉宋交公卿莫知數生既等浮雲死卽同朝露世眼多瞢瞢誰能測其故

右靖節書院

靖節書院三里至圓通寺亦南唐李中主所建也其制與開先歸宗等覺浪師嘗講經於此未久卽去命其徒卓菴主之後亦去蓋寺僧氣味不相合也昔歐陽公過此與禪僧居訥談達旦贈以詩訥爲作夜話亭以識之又蘇老泉嘗攜二子寓此寺人亦作一翁二季亭今并廢

歐公闢浮屠晚乃好緇衣偶與訥公語中宵坐林扉三蘇本夙慧筆舌多禪機曾居此寺中寺僧知者稀所以浪丈人一去不復歸

右圓通寺

圓通寺三十里至東林寺晉慧遠禪師所居也其右西林寺乃遠公弟慧永所居劉遺民周續之輩結白蓮社於此謂之十八高賢而淵明修禪不與焉今虎溪三笑亭猶存梵剎荒涼不及圓通多矣

二慧皆聖僧東西結林殊遠意務廣博永性矜高孤所

以十八賢獨與遠公俱宗風既零落梵宇亦荒蕪異代有淵明過此徒悲吁

右東林寺

東林寺之北有大林寺十八高賢中疊說所建也白樂天嘗獨遊此序云大林窮遠人跡罕到環寺多清流蒼石短松瘦竹山高地深節候絕晚於時孟夏如正二月天梨桃始華潤草猶短人物風候與平地村落不同因成一絕句人間四月芳菲盡山寺桃花始盛開嘗恨春歸無覓處不知轉入此

中來

山北多奇勝石門信悠哉豈知石門東大林復崔嵬高寒節候晚四月桃始開徑僻罕人蹤司馬城中來題詩在蘭若讀者嘗徘徊

右大林寺

大林寺之東即香爐峯白樂天草堂記云匡廬奇秀甲天下山山北有香爐峯遺愛寺介峯寺間其境絕幽又甲廬山某見而樂之若遠行客過故鄉戀戀不忍去因而峯腋寺作為草堂則今紫雲菴後是其故址開先寺香爐峯下亦有草堂遺址當是後人附會為之恐即太白書堂誤為白公耳

江州名宦多吾愛白司馬築室香爐峯盡室處其下當時有官守豈能越郊野黃巖遠且巉知是後人假東林訪遺蹤將以告來者

右香爐峯

香爐峯東北二十里有濂溪祠本濂溪書堂周元公知南康軍日嘗過潯陽愛蓮花峯山水之勝遂築書堂其下而取故里濂溪之名名之明以他日不仕歸老於此其後果定居焉先是其母鄭太君葬丹徒縣爲水所齧徙葬江州栗樹嶺先生沒亦葬其側今書堂與墓皆在數里之內邵公寶疏請立祠著令典又於道州取先生裔孫其來守祠墓過祠三里卽湓城矣

春陵與湓城迢遙隔江湖祇因愛廬嶽遂家此山隅高風被二羣百代永不渝我來山南遊雅欲求一區不知異代後亦有書堂無

右濂溪祠

方文曰廬山蓋介在南康九江之間繇南康上者則先白鹿樓賢由九江上者則先東林天池無所謂內外遠近也然山形南而北背游者先面而後背理亦宜然且南康有落星渚宮亭湖之類九江

有庾公樓琵琶亭之類皆古人遺跡而詩中不錄者誠以其地邊江湖去山稍遠故不及也予遊山時在季冬風雪江寒頗難尋訪不無罣漏之譏來歲讀書白鹿洞中從容遊覽并搜前人詩文雜著薈爲一書曰廬山志後之君子庶知所考焉

夢崔正誼李旣林二明府見訪談笑竟夜醒而有作
癸巳

我生貧賤交強半委秋草眼前富貴人率非我所好何緣遇崔李一見遂傾倒仕隱雖殊途握手傷懷抱前年石臼湖去年司空山兩公爲地主朝夕相往還脫畧禮法外縱情詩酒間知我窶且貧厚貺無恡顏別崔乃三歲別李復一載音問雖已疎心期未曾改今夕是何夕春山臥煙靄雙雙入我夢喜見神明宰笑言宛如昨達旦猶未窮知君念我意與我思君同三月楊柳花飄飛

各西東何時重會合轉似夢魂中

暑夜行

夜熱不能寐起行步南軒一庭松月小三徑槐陰繁出門何所適乃至川上原童子追及之勸我還入門山中有猛虎時時踰人垣旣啖東家犬又咋西家豚農夫相告誡夜不行空村我笑謂童子勿聽農夫言古者修真士巖居臥雲根日與猿鹿狎時見虎豹奔何曾遇侵害翻得試心魂我雖未聞道骯髒立乾坤鬼神且弗疑鳥獸何足論徘徊林樹間仰首延朝暾

喜雨

長夏久不雨田家憂旱乾日夜轉枯槁陂池澤已殫旱禾雖得刈僅乃供朝餐私廩尚不實公稅何以完豈知

去暑日甘霖沛雲端一夕遂霑濡百頃皆浩漫晚稻屈指收農夫舉手懽天心本仁愛惠我亦何難

秋夜聞松聲

茅堂隘且卑喜在長松下開戶納涼風可以恣休夏夏熱猶可居况乃清秋夜夜半風雨作松聲似泉瀉彷彿廬山時開先共僧話

噉椒堂詩

爲左四子厚作

我昔登茲堂總角六齡耳先君官司農少保尚御史老友結重姻拜謁攜小子小子幼誦詩秋興如流水抗聲吟席上少保驚且喜一首飲一盃八盃竟醉矣踰年我遂孤少保去京市九載別始還我已隸博士學文雖未成愛我筆清泚此時時立堂下訓誨非一指未幾璫禍作

果見泰山圯合族田俱賣此堂幸未毀舊廬分仲季閥
闕嗣前美休那姚先生口不妄臧否錫名曰噉椒厥義
何碻礧復爲文記之秀折妙無比我好游四方數年未
歸里今秋風雨涼入城聊訪爾爾復命我文豈有加於
彼俯仰今夕間又不能自己吾鄉風俗偷所志在青紫
科名爭相炫利祿互相侈譬如井中蛙窺天不盈咫君
家兄與弟少保遺芳軌况乃直指公典型猶在邇讀書
務沉靜脉脉求神理胸懷尚灑落慎勿習貪鄙節義良
可珍富貴何足齒嗟彼槿花紅朝榮夕已死豈若青松
勁千歲勤仰止不信視乃翁巍祠建城裏我忝少保婿
風節頗自矢雖非乘龍客亦不涸羊豕所恨當明時因
厄未曾仕那知堅忍性得力反在此偶來噉椒堂把酒

笑相視吐詞樸無華信筆揮此紙

宋儒李文定祠

李燾字敬子號弘齋諡文定

艾人相與言輒稱李夫子借問夫子誰弘齋李燾是昔
遊晦翁門心學冠多士繼起主白鹿從者如歸市以故
里中人崇祀北山趾俎豆五百年焚燒自今始空餘舊
臺基其上牧羊豕碑碣臥草間文章半泥滓聞公裔頗
繁食粟踰千指胡不念先澤荒殘一至此吁嗟世運衰
人莫重青史大賢且慙遺我輩何足齒

炭婦港

世傳許旌陽顯化在江楚能以大神力拔濟民生苦當
其未昇時往來鄱陽渚弟子十二人人是仙侶相隨
良有年未知果孰愈一日過修江雨雪困羈旅笑指壁

間炭化爲十二女顏色妒桃花衣袂隨風舉夜就諸生
室私心實難拒詰朝驚相視面目黑如釜中惟吳猛生
體不沾纖縷以此得傳道高名並千古厥後李龍眠小
官寄茲土睠焉懷往蹟時時造南浦猶餘炭婦港去城
三里許仙蹤久寂寥仰首空延佇邑人慕其風謂足繩
乃武因有李仙亭結構傍山塢我來復訪之亭壞莫可
睹所見皆村叻深衷向誰語

大孤塘阻雪

鄱湖雨雪繁半月猶不晴皇皇西歸客淹泊南康城南
康守若令與我有平生登岸一訪之倒屣懽相迎壺漿
畱我飲書籍要我評推食旣不倦分俸亦不輕暫釋羈
旅愁無奈鄉思縈今朝雪少霽登舟促其行行甫及孤

山狂飈復砰訇回檣趨野岸積雪三尺盈臥困遽條中
唧唧聞歎聲舟人相與說大姑最神明曷往一祈禱焚
香致虔誠不望南風起但願北風平雙槳溯江流三朝
抵柴荆入門謂婦子明歲當躬耕嚴寒勿再出再出非
人情

田居雜咏

甲午

山人號明農明農義有二一爲我朝氓一爲野老志奈
何抱微尚從未親厥事祇因凶荒年薄田都棄置人家
重與闢欲贖莫由致今春彭蠡歸故交有所遺內外咸
相勸始定贖田議合浦珠復還泗水鼎不墜盡室處其
中平生願甫遂以後曰明農名實庶無愧

嫡母蕭安人故是名閤子若翁諸伯叔累世家於此厥

名蕭家園周環四五里其田雖瘠薄風土自淳美先君以館甥善價易諸彼身後遺藐孤粗足供簞簋豈知兵寇亂拋荒不復理賤鬻良可悲徬徨非得已今年三倍贖雖貴亦可喜瘠土何足珍先業幸不毀

昔有陳元龍豪氣凌九州求田問舍人嫉之如寇讐我亦負奇氣渺視鄉里儔侈志營四海豈肯潛一丘不幸逢世變懷璧無所投發憤去京邑湖山恣遨遊雖有味歌樂未免饑寒憂何如息塵鞅還歸舊田疇田家力作苦衣食得自由天運苟不回已矣吾將休

南陽諸葛君避世隆中山當其躬耕時樵牧同一班幸而遇明主伊呂伯仲間苟非風雲會泯沒隨草菅我夙慕斯人質絕不可攀惟有方寸心竊比無厚顏吁嗟漢

祚衰口沙蔽人寰鋒鏑且不畏犁鉏敢辭艱靜觀日月
理晝夜長循環炎漢興有期吾寧老柴關

年年江海遊未曾郊野居豈不愛郊野無田復無廬今
茲田百畝旣失還歸余茅屋八九間老農所拮据我來
借一枝農云幸有餘桃李蔭前門松竹環後墟柯條雖
未繁仲夏亦扶疏再擬構三楹可以長讀書池塘蓄鵝
鴨籬落哺鷄豬此日尚不遑須待收穫初

顏子一瓢飲原憲百結衣所樂在聖道都忘寒與饑我
質本淺薄安敢望前徽兢兢持名節於義不苟違往歲
每艱食出門千人非今幸有救粟豈復求甘肥試觀溧
陽生爵祿非不巍一朝黨禍作千里輿尸歸身死何足
惜名敗良可歆感彼田家叟終身無禍機

是年陳名
夏遇害

太湖詠竹題章明卿壁

我昔游熙城借居章子屋屋雖不甚廣門徑頗幽曲二
婦室相連芭蕉映窗綠偶見南郊外一竿新紫竹呼兒
剔其根根淺斷復續持歸手自種於彼芭蕉傷幹無一
指大梢有三尺長汲泉頻灌之惟恐生意傷秋來風雨
作枝葉何蒼蒼芭蕉到冬萎竹獨傲嚴霜明年予歸去
三歲重遊此行及舊蓬門先問竹生死竹母大如前兒
孫四圍起抽梢已過牆密陰能暗几章子引予看謂予
竹知已竹見予似喜我見竹轉悲昔居此室中小婦曾
產兒數月兒復夭葬西山陲此竹乃生孫我男尚無
期感此長歎息章子色不怡

秋夜吟

田居惟一室四壁皆土功冬溫夏陰涼寢處宜其中秋
天夜悄悄但聞壁間蟲蟲聲非一響亦似吟能工居人
不能寐聽之感微衷促婦起披衣門外乘涼風況有榆
柳月照見禾黍叢願言事躬耕所恨年不豐良夜無酒
飲坐惜清景空還歸土室卧竟夕蟲聲同

姑溪懷古十詠

乙未

溫嶠然犀浦

溫公本天人無乃太好奇幽明理自隔何苦獨見窺職
此命不延靈爽當在茲我來燃犀亭把酒一酌之

桓溫白紵山

孟嘉沈下僚目中無宣武吹帽事尋常簡脫意千古有
丘在城隅攜妓歌白紵其山雖以名其人不足數

宋公凌敲臺

宋公移晉祚雅欲崇節儉何爲姑溪北燁然起宮殿避暑誠有之未必恣荒宴許渾詩近誣今人莫爲辨

謝眺青山

玄暉有道人不得是詞伯朝辭宣城隄幕返青山宅曷不歸故里浮生總如客嗟彼行路者役役何所迫

謝尚賞咏亭

牛渚月明夜忽聞咏史篇呼之問姓名執手情懽然後代撫軍者勿輕佔客船秋水蒹葭中往往有遺賢

丁令威靈墟

遼東有仙子流寓黃山陽舉身化白鶴千載還故鄉城郭少人民塚墓多牛羊獨立華表上惻焉心暗傷

李白捉月亭

世傳李供奉捉月沈江波胡爲復有墓於彼青山阿當
是永王時畏禍脫網羅斯人竟流落命也將如何

郭祥正隱居

聖俞工詩賦平生寡所親一見郭功父歎爲青蓮身聞
有醉吟菴乃在姑水濱世遠人莫識懷古空傷神

虞允文祠

金兵四十萬風雨來江北虞公一書生挫之有餘力文
陸豈不忠那能戰則克垂淚拜荒祠斯人今安得

常遇春戰處

太祖初渡江直指姑孰城元兵守江岸險絕莫敢撓一
躍上采石勇哉常開平開平久不作豺虎縱復橫

金上集
施粥行贈曹二梁父

田家望有秋所患非一端去年旣水溢今歲復旱乾膏
雨久不降川澤潤亦殫五月禾苗焦隴畝何以安婦子
相抱泣累日無朝餐乞食盈道傍欲行步蹢躅仲子偶
出門見之中心酸歸來視倉廩尚有百斛寬慨然命浮
屠炊粥救衰殘每食三千人人與粥一盤老幼鮮不飽
性命得苟完粟里嘗叩門淮陰亦持竿古來賢達士尚
不免饑寒矧此蚩蚩氓窮餓良可嘆他人習鄙吝坐擁
金琅玕誰能捐斗粟俾爾羣黎驩有客泊姑水臨流浩
漫漫泚筆揮此詩將以激頽瀾

懷羅天成西江不至

昔我去于湖君游南州遠今我來于湖南州猶未返于

湖多所知愛我似君鮮三年不相見懷抱何由展我家
本寒儉漂萍莫能免君猶粗自給何爲亦蓬轉乃知磊
落人今古多偃蹇麟鳳匪不奇俗眼竟誰辨昨日寄我
書其言悲以婉相期天中節歸晤當不舛葵榴花正開
曉夜露方滋此際果逢人曷敢辭沈湎

送薪行荅胡公嶠

淮西本山人種山亦已久樵蘇不用錢草木惟自取侵
晨持斧出刈薪向林藪童子負荷歸狼籍委園囿一遭
兵火亂山木悉無有拔宅浮江湖賣文以糊口世人罕
知者玉瓚同瓦缶經旬纔舉火饑餓良可醜胡公南州
宰期月遂解綬訪我飯籬山又復攜尊酒見我焚蒿萊
欣然惠榆柳此物豈足多感君用意厚維時天亢烈禾

苗半枯朽薪米俱騰貴誰能給升斗寄語關大夫可似胡公否

七夕立秋飲杜杜若寓中限秋字

有客自涇渭駕言江北遊吾鄉亦何幸得以炎暑畱解鞍歇荒祠祠接城西樓登高發長嘯鸞鳳聲悠悠聞者悅其音縞紵爭相投君子不苟合獨與吾黨求晨夕一披衣風雅成獻酬今夕是何夕天漢雙星流況於露井桐一葉零新秋客行感時序悵然懷故丘貰酒命同袍浩歌以忘憂林端片月出空際微雲浮延頸受涼風行見暑氣收自言三五後澄江掉扁舟嘉會不可長離別令人愁惟應及茲月夜夜共綢繆

偕王以介入山訪元尊宿

丙申

大師厭塵囂屏跡深山裏况當休夏時門外無一軌忽
聞空谷音亦覺趫然喜借問客爲誰方子與王子王子
金閨彥秉性慕禪理與師有神契妙悟融乳水導我入
香林芬馨被蘭芷層崖五月寒涼颼四隅起日夕遂忘
歸經房乃棲止茅茨新結構亭亭在山岨中有二竹牀
枕簟陳於此午夜魂夢清不復知城市駐此可延年告
歸亦何駛嗟我根器薄所役惟書史晚歲遭奇禍痛恨
入骨髓誓將斷情緣從師問生死

金陵訪王元倬先生並題其南陔詩

南中高士多元倬爲第一盛年罷公車養志不離膝人
爭慕旃裘君獨守蓬蓽救水有餘閒專心事詩律旣登
風雅堂復入比興室所痛惟君親其他不足述我亦詩

家流哀吟冀相質君適去吳門惆悵若有失羣言彙南
咳李生出其帙讀之再三歎落木聲蕭瑟逾月君始歸
我復揚舲疾倉皇一過晤懷抱安得悉是時霜雪繁朔
風何凜栗寶此松柏姿以待初陽日

訪孫豹人不遇因題其壁

虞翻天下士知己無一人斯言初似激久乃識其真我
生好結交交亦半海內豈無文章伯實少同心輩同心
亦有之才藻或不如才藻卽英發未必多讀書吾欲求
完人僅見一孫八秉節旣堅貞摘詞復淵洽前年游我
里傾蓋如故知臭味自相合不異鍼與磁招我來蕪城
江關好流寓今春遽家難益思傷君住豈知我舟到君
復游武林門巷頗幽邃木葉空蕭森整冠上君堂三子

出見客委曲問而翁音書久睽隔鄧生武林返言共君
羈樓雅游不得意尚困西湖西何不遄歸來家園聊卒
歲雖乏沽酒錢鸛裘猶未敝况聞予在此晨夕相與游
知已有真樂屢空何足憂

露筋祠

揚舲明月湖有祠在岸北舟子汝且停吾欲禮前德娟
娟一弱女乃爲丈夫式嗟彼行路人胡不自努力我亦
處子身四十猶未適雖不就人宿未免就人食以此十
餘年偷生延一息仰視露筋者私心悅無極

題張虞山理琴圖

昔有汪水雲抱琴訪燕獄文山序其詩皋羽譜作曲詩
存琴不傳遺響諒難續虞山者誰子異代承芳躅詩以

寫哀怨琴以慰幽獨端坐古石間神情澹而穆憂來時
一彈悲風振陵谷水雲不可見見君吾亦足

述哀

丁酉

我母年七旬老健世莫敵齒無一箇毀髮無數莖白耳
目轉聰明內外都不隔子婦私相慶壽考當至百去年
三月初奇禍來頃刻大婦中風死外家構成隙小婦橫
被戕胎墮復腦圻凶人斬我後田園又見奪以此傷母
心形容頓枯瘠髮如腐草黃面似樹皮黑終朝但昏睡
不飲亦不食兒心憂徬徨莫敢離閭閥延醫視何病皆
云憊痛亟藥餌扶至秋稍稍有起色移居向樅川村舍
甞休息母忽召兒語故鄉居不得汝往江淮間處處有
安宅任意擇一枝繼室延一脈俟汝有定棲迎我我當

發早則今冬來遲不妨春月汝勿憂我老尚有幾年活
兒泣不能對中腸痛如割往歲兒好遊舉家同作客母
老只思歸苦勸兒耕穫兒歸遵母命贖田種稻麥豈知
爲厲階卽在此阡陌宵小覬覦久欲攘却無策一旦却
乘危得以勢相挾奪田猶自可殺人何太惡殺人而奪
田世無此狠賊故鄉不可居誠如我母說時維十月交
空林戰霜葉兒辭母出門母手爲縫袂丁寧戒僮僕寒
濤勿輕涉鼓櫂指淮揚舊友頗不乏見予各興歎酒脯
時時饁商量居室事機緣尚未合蹉跎歲將暮山陽過
殘臘除夕風雪中孤燈暗禪榻思親兼悼亡悲歌淚盈
睫開春多噩夢神志每皇惑便欲促裝歸其奈資斧竭
俄驚家人到奔走勢勃勃傳言去年終阿太已奄忽乍

聞魂魄飛一慟肝腸割嗚呼滄浪天忍降此酷罰我罪
果深重胡不自殄滅災異起房帷侵尋及耄耄遙想屬
續時光景甚淒切兩婦先期亡獨子又遠別雖有二孫
女孤幼無知識薄棺貸親串含襖仰婢妾貧家患難後
纛布亦鮮缺况值窮冬時江關阻朔雪楚州千里遠音
信何由達浹旬書始到旅次聊袒括殷憂比長淮潏泱
不可掇淮人聞我訃唁者踵相接旃林爲母位枉弔皆
賢哲醵金以致祭牲醴克庭列誄文旣歎懇挽詩並愁
絕重以賻襚資腴厚踰常格感此錫類仁臨岐更悲咽
歸路出隋堤揚帆經建業采石與蕪陰高人夙所愜憐
予奔喪回賻誄亦稠疊但恨石尤風江行苦不捷寒食
方抵舍柴門氣蕭瑟我號入中堂二女亦號出撫棺哭

聲亂麻衣滴成血斯時方寸心痛如攢萬戟拜罷不能
起二女前扶掖隣里爲酸辛天地亦慘戚問誰張虐燄
使我至此極追念先司徒五十始釋褐衰白嗣猶艱望
之若饑渴歷聘得吾母懿行在拙訥果兆熊羆祥謬許
爲英物小子生不辰七齡司徒沒母年未及壯守貞志
不屈以母而兼父教養咸有術兒長粗能文母日望簪
紱一從滄海變偕隱甘巖窟性淨不苟暈長齋惟誦佛
雖無鐘釜養庶盡菽水職春暉不肯待風木嗟何及人
生必有死七十非夭折所痛桑榆年轉見家蕩析無孫
已閭傷無婦又增恤婦死亦多有斯人受冤抑事姑十
二年孝謹無纖失况懷五月孕預喜孫枝茁匪因霜露
隕乃遇豺虎啞倉皇莫能救悲憤遂成疾雖以天年終

實爲讎所殺雖死茅檐下直似委溝洫誓不共戴天豈
止不共國顧慙微賤軀欲報苦無力曉夜號蒼穹鬼神
又冥默鮮民不如死偷生復何益茅堂隘且卑風雨撼
四壁母柩難久停須遷就原隰大葬年未利今且治攢
室蓮池水澄泓衆峰何率率信美此山阿況依先祖側
於禮合廬墓兒則未敢必身是刀俎餘尚恐嬰鋒鏑行
當辟讎去不論天南北方技知卜醫可以代耕織餘生
苟不死報恩應有日至辛莫如椒至苦莫如藥我今走
四方椒蘖甘如蜜準擬明秋還送母歸窀穸願母神靈
安九原勿崩迫鬱鬱蓮華山青松高百尺上有慈鳥巢
夜半啼聲急聞之愴人懷殊愧彼羽翼身雖去母傍夢
仍遶母膝欲記夢中言昏瞶難具述此恨抱終天哀吟

何時畢

附題後

此詩渾似北征篇母死家亡更可憐夏雪冬雷天地
合知君恨不化寒煙

梁公秋

新詩讀罷淚油然紙上啼痕染杜鵑我有父兄千載

恨對君霑血拂龍泉

宋玉叔

世間風木自堪悲孝子如何遭禍奇讀到酸心無可
似陳情表與蓼莪詩

孫豹人

題李三石畫冊

李生往我寓手持三石圖言是宋人本近屬盛老摹問
君曷取此取其與字符又問石安在乃在今南都年久
石湮沒不知落誰家我笑謂李生君欲見此無逶迤鳳

鳳臺臺之西南隅昔爲徐王園今歸吾鄉吳三石儼然
存更有白松俱我嘗見此石石上字非誣生聞驚且喜
要我同步趨吳園不甚遠入門路稍迂直至松石下俯
仰增嘆吁此圖卽此石向者何其愚孟夏風日佳君當
攜一壺來就此石飭痛飲復狂呼人石比堅貞異代永
不渝

家音
姑

嘉樹行爲閻牛叟賦

我愛飲牛叟頻過嘉樹軒嘉樹是何樹銀杏枝葉繁昔
者叅議公手植城中園園爲兵所奪因移湖上村壘石
以爲山編竹以爲垣豈真愛此樹所重先澤存不知去
年冬何物傷其根枝葉漸黃落枯焦似人燔或謂空斬
伐主人不忍言雖萎亦手澤遺愛安可謾遷延至秋初

生意忽爾蕃主人不勝喜召客來丘樊置酒此樹下
懽劇時一捫矚茲草木理因悟天地恩盛極有時剝剝極
復還元世運苟如此吾衰何足論

將去彭城畱別魏少尹竟甫

君昔令修江我曾一相訪是時天苦寒雪片大如掌短
褐尚不完敢作狐貉想荷君脫裘贈高義傳吾黨明年
其官遷淮徐幸接壤恐爲馮婦笑勿復來瞻仰今夏泊
隋堤邂逅遇官舫握手道舊懽襟期益散朗問我欲北
征彭城路非枉相期雲龍山把酒一吟賞以此七月初
黃河溯雙槳豈知我舟到君車又他往知有公事累旬
日絆塵網獨憐羈旅人孤懷太蒼莽朝看河水奔暮聽
河水響枕上愁心煩鏡中白髮長我命合迤邐萬事成

虛岡行當掛席去機會不可強

馴鶴亭詩

自有彭城來卽有雲龍山如何宋以前名不著人間直
至張山人作亭曰放鶴蘇子記以文其名始磅礴乃知
山川秀必待文人傳設不遇文人草木空雲煙吾友魏
少尹疇昔擅風雅治河來此州登臨更瀟灑築亭官舍
中亦以馴鶴名仕隱雖殊途飲啄同一情仕者義取馴
隱者義取放其人總清遠於物等閒曠顧昔隱者亭太
守爲屬詞今也少尹亭復徵隱者詩以我似孤鶴馴放
如君意君誠蘇子瞻我愧張天驥

友人吳燾之父諱汝琦死歸德之難徐州志不敢
立傳予感而題此

吳公彭城彥筮仕爲司李睢陽古名魏服官數月耳是
時神京陷中原蕩如洗復聞左賢王萬馬度河水將士
迎風靡夜半城門啟直指凌公駟與公誓一死寧甘蹈
白刃不肯屈其體學使蔡公鳳同日刑於市臨刑頸無
血白氣從中起觀者咸嗟嘆具棺葬以禮其子收遺骸
安穩還故里忠節昭日月江淮傳盛美胡爲修志者隱
諱不敢紀世人好媿阿湮沒寧止此吾憤題此詩將以
裨野史

子房山

子房韓公子所痛在韓滅助漢以誅秦初非好功業其
志惟復讎讎復志已悅飄然從赤松皎如松上雪聞其
少年時吹簫此丘垤因以公名山廟祀永不絕我來拜

祠下彷彿見風烈亦有區區心人前詎能說

四女寺

朝發甲馬營晚泊四女寺不知四女誰上岸閱碑記漢
有姓傅翁田園故多利所欠惟一子四女並聰慧俱不
願適人願終孝養志親亡卽焚修出家居此寺中庭植
古槐枝葉表蒼翠竟以處子終白首乃仙逝相傳至今
日此寺遂不廢吁嗟天地間所重惟節義豈無偉男子
鮮能畢所事四女良獨難可以風士類

命山集卷之三

皖桐方 文爾止著

埭繡水王 繁安節校

黃州王澤弘吳廬定

七言古體

啓一子建作連理圖贈予賦此答之

戊寅

於戲我祖明善真大賢白沙舊有桑麻田迎兄伯氏居
其間至性篤摯情纏綿茅屋春回讀書處誕生二木庭
堦前左楓右杞本異質一朝合抱相勾連君子謂是孝
德之所致小人謂是富貴福澤之幾焉我祖倡學旣名
世又賴吾父伯父叔父相後先簪笏浮榮等閒事所貴
吾家孝友之德永不愆嗟我九孫紹丕業牙籤錦字羅
青氈羣從又將三十人風流文藻何翩翩子建乃爲羣

從長靈心惠識通淵玄賦詩雅似阮嗣宗綴文不愧班
孟堅有時伸紙拂絹素下筆輒作名山川今年與我重
過白沙嶺栖息連枝亭之偏仰思二木發祥日到今七
十有九年其下根株輪囷各十圍其上枝柯糾曲摩蒼
天秋霜楓葉飽丹赤杞條積翠還蔥芊我謂子建汝作
圖子建不答神悄然歸來神悟三五日須臾滿腹生雲
煙旣作連理圖復作連理篇大巧奪天工中聲動危絃
懸之七弟高堂中清風謾謾披四筵客來罔不歎奇絕
君家復有唐鄭虔我欲畱之遺吾後俾知祖德之隆盛
將與連理樹並傳於戲我祖明善真大賢我曹子孫其
勉旃

寄懷齊方壺

去年楊柳花飛白與君同作江南客鷄籠山距冶山長
花下一樽猶間隔今年楊柳花白飛我在江南君已歸
千里家山魂夢遠三江雨雪信音稀敝裘仍返龍眠曲
曲澗滄浪濯纓足賦就光搖合浦珠詩成泣抱荆山玉
山中結伴有左生圖書文史何縱橫左生量弱不能飲
誰將斗酒爲君傾有客東來自江滸道君念予情最苦
楊雄識字惟桓譚太白知心僅杜甫可憐半載喪二親
弟兄析箸家酷貧妻子嗷嗷守空屋一介不肯干求人
嗟乎君才天矯如驚鴻奈何委頓荒山中眼前碌碌少
知己我輩數人西復東昨宵夢見君顏色神情憔悴面
顰黑別後相思思殺人夢裏欲畱畱不得我當八月歸
故山直到龍眠欸柴關預將十千沽美酒與君痛飲十

金上集
日不得閒庶幾登高一嘯開心顏

寄懷湯季雲

已卯

我思美人在城曲古寺遙深寄芳躅舍後千章榆柳青
門前一帶菰蒲綠美人此際愛閒居花水重陰照讀書
疎簾靜捲三山雨冰簟香分四夢餘兀坐馳情渺滄海
毫光墨氣紛殊采荆國才華豈足多禮部風流今未改
尊公若士思君朝夕誰共游咫尺之間有吳劉陳子精
爲禮部郎舍亦未遠奇文疑義相與求
吳次尾劉伯宗陳定生寓俱近寒子抱病
江村暮欹枕胡牀盼雲樹幾欲攀條遺所思長河水斷
橋頭路明朝雨霽暝色開且呼小艇城中來古寺遙深
恣幽討更尋羣彥登高臺

題張方伯忠節卷

□□三犯居庸關今年直薄龜蒙山濟南名郡古侯國
一朝摧破如等閒是時方伯張公立城上戰守無兵復
無餉矢將一死殉孤城頸血雖流氣猶壯其配淑人乃
吾姊高樓晏坐聞夫死盛服明妝出後園顧盼從容赴
湖水公有二姬矢報公存沒雖異忠貞同一抱巨石沉
水際一擁殘雪藏溝中公死十日賊兵去有婦零丁出
沙泖城中積骸高如山尚尋三屍歸一處逢人號泣訴
煩憂人聞公名亦淚流給錢買棺買布縷聊與小斂還
故丘有子若女罹虎口殺戮饑寒復何有不知棄捐大
路傍母子重逢信非偶嗟乎我公之死如秋霜三婦從
之亦慨慷此婦不死非不剛借問此婦亦隨秋草萎誰
與收公之骨撫公兒公有舅氏齊重客七十八齡老詞

伯彩筆如椽紀其事一門風尚何赫赫予亦題詩附篇
末

送蕭賡九北歸

庚辰

庚辰元日華陽路曉風吹散關門霧有客江城共行役
野店壺觴序情懷昔爾新從北地來是時南國羣賢聚
交游惟我最敦好往還文酒無朝暮自爾一去燕山遙
五載秋光等閒度相期南北各奮飛金門蚤獻長楊賦
我之從子爾之兄眼看白日翔天步偏我與爾好奇服
四海茫茫罕知遇冬晴懷友復南來往日緇衣今已素
長干一見喜且悲儒冠端被虛名誤回念舊游淚雙落
劉子蘇王皆物故雖有存者亦凋零耿耿離腸向誰訴
此際江南春正芳奈何又指桑乾渡男兒富貴不可期

百年壽非金石固祇須飲酒樂朋侶那堪騎馬犯霜露
蕭郎蕭郎聽我言移家且向南中住

寄懷魯孺發天門

君不見姑孰之郡天門山長江浩浩流其間東西二石
迴相望層崖斬絕難躋攀東峰月出西村暮江草芊眠
隱江樹數家籬落半漁樵中有美人託芳步美人昔住
鍾山陽韶音令旨聞四方手抱瑤琴理清曲華林日夕
羣鴻翔可憐世亂遭遷次幾度上書不得志江湖常有
廟廊憂逢人好談天下事白門楊柳秋復春客思蕭條
多苦辛一朝束裝載妻子乘潮直至烏江濱故里凋殘
不可返停舟且息天門阪白沙翠竹藹西村此去江南
亦未遠嗟乎子敬大畧王佐才豈能鬱鬱棲江隈天門

雖勝苦離索勸君石城還復來無爲輒作江南哀斯言
非獨我如此次尾伯宗亦云爾

禊日牛渚

辛巳

去年禊日在真州與客沽酒臨江樓今年禊日在牛渚
客亦送酒停行舟年年此際恨離別江草江花相對愁
丈夫不入承明廬何爲汗漫游滄洲滄洲汗漫已可惜
依人寄食彌足羞幸有主人賢且豪寸心相許無疑憂
淮南二月春水碧單衣匹馬從之游君不見鴻鵠一舉
自千里安能久與燕雀儔

喜馮歎然歸自白門

壬午

去冬我自秋浦來君舟恰向宛水開今春君到白門裏
我復揚舲之宛水可憐鴻雁各東西羽翼差池長不齊

渚上寒雲空漠漠堤邊芳草又萋萋白門數有音書至
書中每道心中事宛陵年少多豪賢更說諸君名姓字
才思贍藻稱聖期懷抱磊落推杓司風神延祖最冲澹
意氣維伯何恢奇寄言命我交四子豈知交好先在此
芳樽晴步響山雲蘭橈雨泛雙溪水日日思君君不歸
林陰已滿羣花飛旅次忽聞故人至科頭握手無裳衣
別後離情那可說移觴過我月初白庭生抑之與景山
邂逅同爲不速客相逢痛飲酒如泉况迎翠袖高樓邊
主人已醉客且去閉門欲擁妖姬眠

贈徐善生

古人書法各精妙我獨酷嗜顏魯公上凌魏晉下唐宋
皎如日月行太空蘇米諸家法非一何人不自此中出

縱能闢入公門牆終未升堂與入室我學顏書非不專
但恨落筆心茫然昭代亦少爲此法於今始見徐東田
東田宛陵貴公子弱冠學書卽學此文采風流五十年
窮神知化猶未止顏公遺跡皆小書廟碑壇碑隨卷舒
君用其法作大字長至數尺或丈餘聞君用筆如用鐵
累黍不差果奇絕有時摹柳復摹歐錯亂古人迴無別
東田抱道含天真功名遲暮家赤貧閉門却掃寡游侶
不肯酬酢尋常人以是書法備衆妙四海聲名仍未噪
性情亦不求人知白髮雙谿守耕釣我來訪君君病起
倒衣相對欲狂喜呼兒剪蔬畱我飯言笑綿綿富清理
我爲君歌秋水章君爲我書雅南堂顏公生氣凜可見
草廬萬古生輝光

贈黃穆生

癸未

今之杭州古臨安山川冷落風景寒官斯土者皆不易
郡邑以下難復難我友黃子跼蹐才奈何屈節爲此官
吁嗟黃子爲此官令人氣短興慨歎猶喜相逢雙憲使
吹噓逸翮生羽翰聖朝用人破資格安知不冠惠文冠
黃子勞苦宜努力好移花樹栽江干知君橐底俸錢薄
可能沽酒飲所歡

送錢而介歸樵李

余年二十游嘉禾禾中好友良獨多其間最愛錢伯子
稱詩命酒頻相過可憐一別十三載雨散風流竟安在
蹇予屈蠖歸南都君亦蟠龍卧東海東海南都千里餘
山川寥廓音問疎離情耿耿向誰訴開篋見君前日書

今春理檝錢塘歸重到嘉禾訪君屏君復揚舲游白下
湖橋悵望江雲飛及歸南湖春已暮人言君在桃葉渡
冒雨相尋古寺中握手懽然道情懷故人握手雖足懽
懽情未了興慨歎天上歲星過一紀人間恨事盈千端
男兒立名苦不早意氣就衰顏色槁牀頭破甕有老春
且復與君共潦倒吁嗟蒼天必欲窮我身何爲突兀生
斯人但使斯人身不死安能扼抑長賤貧錢子錢子且
歸去饑寒困苦何足慮會當簪筆承明廬立馬相逢杏
花處

送陳旻昭御史徵兵廣西

崇禎癸未秋會試進士四百百名士我友二陳俱巍科
一爲旻昭一百史百史賜第承德郎旻昭注官乃職方

文學侍從讓爾汝職方治兵臣所當方今盜賊亂中土
郡縣殘破無安堵不聞官軍禦強敵獨使殷憂累明主
臣少曾游粵西東親見徭人特驍雄朝廷結之以恩義
皆能殺賊成大功以此上書與執政執政持書達天聽
至尊側席求賢良讀罷肅然起恭敬一朝召對觀德殿
太子東面上南面小臣再拜陳奇謨左右何人不稱善
上語太子此異人庶官碌碌無比倫忠勤智勇復弘辨
孟軻所謂社稷臣賜金賜服冠獬豸秉節徵兵向炎海
雕題黑齒雖蠻族沐浴皇恩三百載使臣宣布天子言
諸徭感奮趨中原先期滅張後滅李羣兇授首何足論
我聞本朝書生能用兵前有襄毅後文成君今用兵亦
在廣欲與二老齊功名功名富貴非所好平生學力在

聞道晚年特達受殊恩不剪羣克何以報君不記貧賤
時二陳二方號相知三人皆貴我獨賤鉛刀不割空自
嗤願君早奏昇平畧漁海樵山任所之

惠泉歌

甲申

惠山之泉天下聞惠泉釀酒良清芬平生雅嗜惠泉酒
恨未一看惠山雲比年來往東吳路舟人不肯少亭駐
引領雲山興欲飛一水迢迢阻官渡今夏冒暑無錫過
役夫疲困南風多道傍密陰且休息因之理策登山阿
千章夏木亂崗嶺中有方亭覆二井一井泉甘一井苦
甘者行汲苦照影山水性情何瑰奇咫尺之間分淳漓
世人不識山水理但聞惠泉便云美予家乃在龍瞋山
中有清泉日潺潺其味與此正相似從不著名於人間

乃知山水亦有幸不幸所居衝僻是其命陸羽品泉亦
偶爾如謂真有第一第二吾不信

武林偕沈葵菴少府飲倪玉純宅

宛溪之水東北流敬亭高齋居上頭兩人先後薄游此
多情少府何綢繆別來失職歸鄉里自傷貧賤負知己
三年苦憶敬亭雲一朝巧遭西湖水入門勞問便加餐
菱茨梨栗香滿盤爲君之故累百爵自到武林無此歡
可憐酒罷天色暮又隨少府丹陽路回首西陵欲斷腸
茫茫秋雨迷秋樹

偕蔡芹溪至宛兼贈令弟玉立

前年寒食楊柳青有客同舟歸敬亭今年長至雪霜白
歸舟又附敬亭客茅堂破壁風蕭疎苦死必欲畱客居

金上集
黃鷄白酒恣啖飲下牀上牀尊不虛方今日月失其位
風塵兵甲滿天地虎豹當關欲噬人季女何能不憔悴
君家兄弟皆賢豪大者孔融次孔褒褒愛其兄促之去
且與張儉齊遁逃

萬歲樓同潘江如作

乙酉

潤州城中萬歲樓其下橋亦名千秋古人登此必觴詠
意態往往凌滄洲後之作者何太惡改其名曰月華閣
我問萬歲人不知非君自引路幾錯樓門又扃久不開
客至但登樓後臺左盼江水右城郭臨風徙倚空徘徊
因憶昔遊宛陵市此與高齋類相似高齋亦改疊嶂樓
世間咄咄多怪事君何不把如椽筆重書萬歲樓三字

汾湖贈祖仲美

汾湖之水白如練左爲吳江右嘉善孤村僻遠無兵戈
夏木秋苗滿芳甸我因避亂來此里停舟悵望少知己
柴門有客懽相迎問其姓名祖仲美仲美風槩昔所聞
嗽崎磊落意不羣吾友二錢止厥室割鷄餉黍何殷勤
舍後若兄有餘屋慨然灑掃畱我宿中庭桂樹吐奇香
往往提壺坐修竹史稱張翰東吳人罷官卜居此湖濱
尊羹鱸膾菰米飯至今秋氣長鮮新我欲移家安此土
荒村幸不聞鼙鼓其如□□□□何所謂苛政猛如虎
吁嗟世事良悠悠烈風腥穢無時休君家士雅今何在
灑酒吳江空自流

贈別周頴侯

丙戌

吳中大姓陽羨周其門冠蓋如雲浮文章雖多性情少

獨有一人曰穎侯穎侯二十舉高第上書執政忤時忌
罷謫榆關春復秋稍轉一官東海濤言芳行潔師古人
白玉不肯汙纖塵閩南州郡罕廉吏自古未有如君貧
甲申之變天地裂遐荒聞之慟幾絕新詩百首惟紀哀
奉表南歸淚流血臣心本不愛微官每念先皇心痛酸
况當戎馬交馳際矢事吾親終考槃一朝華夏皆□□
小臣氣激欲自盡子舍先書絕命詞毀髮偷生吾不忍
傷哉二老垂白年乃祖八十尤皤然抱持號泣互相守
解縛不得從所天君親一理那可棄且活餘生供粗糲
永棲隴畝爲頑民偶對人言還自愧予雖未仕金馬門
父祖十世承國恩幾欲捐軀勵微節亦以親故遂苟存
君不見陶公集中書甲子鄭公井底傳心史千秋萬代

觀幽貞豈必首陽同餓死猶喜今時文網疎觸犯忌諱
寬誅鋤與君把酒毘陵市狂歌痛飲仍自如如我兩人
性情不易得奈何同心而離居

喜遇從子子畱卽送之寧波

人言汝向南闡來我聞驚絕還疑猜至性如汝且不保
世人寧復可信哉汝到南中非所志或言予亦來應試
汝聞驚絕還疑猜世間那得有此事項之作客武林城
道上相逢攜手行各言前日信疑狀秋陽皎潔浮雲輕
問汝何之甬東去外舅張公官少府汝之外舅我故人
爲我寄聲道辛苦四明山水天下殊神君守此美且都
汝今遊覽得勝槩顧我落魄岐路隅憑將尺書致少府
愛人愛其屋上烏不知肯作居停無

吳門行

一年一度過吳閶腰下百金千金裝今年行李獨蕭索
布衣白袂秋風涼隣舟新到惠泉酒青錢一緡沽一斗
顧我囊空無百錢仰視秋天悶搔首可憐書劒老風塵
客路栖栖多苦辛明朝況是重陽節風雨飄搖愁殺人
疽歎

去年一疽生右肩皮膚赤腫厚且堅良醫施鍼入二寸
流血數升毒始宣今年一疽生右乳潰久不合其肉努
亦有良醫施毒藥爛腐生新陷重補二疽但屬厥陰經
肝火鬱抑氣血停內淫發於懷抱間坐卧行立各不寧
嗟乎蒼天扼我何太酷半世饑寒與憂辱人間好事一
星無貧病二字更相屬吾生貧病曷足悲傷心四海大

運移牢騷憤懣結胸臆兩年疽發身幾危

縱川苦雨柬李仲山孫子穀

丁亥

春寒二月冰未泮苦雨淒風徹宵旦一川流水勢吞江
兩岸行人泥沒骭有客卧病江上村十日不出長揜門
小樓上漏復下濕匡牀獨坐愁思繁特喜閨人伴幽獨
強將蝦菜供餽粥不須取酒典鸛裘自解牽蘿補茅屋
遙聞二龍雲卷舒我欲移家此隱居春來湖畔泥滓滑
欲行不行空踟躕此間朋好何落落鄙夫俗士懶酬酢
屈指貧交三五人經旬阻雨亦遼廓君不見少陵老人
萬古才長安旅次生青苔當時惆悵車馬客今雨不來
舊雨來吁嗟此老尚如此何足道哉吾與子明朝雨霽
天色開共步江頭看新水

潤州訪錢馭少

前年五月離潤州與君避亂吳江秋水鄉聚首二百日
艱辛歷盡還歸休去年五月毘陵路君自潤州來我寓
牀頭有酒傾數升散髮狂歌天色暮今年又是五月初
舟過潤州訪君廬美人庶幾無疾病竹窗藤几閒抄書
見我入門驚且喜素心相對如秋水潘子東歸鄔子存
故舊重逢非偶爾獨憐羽翼爾伯兄江天寥廓無鴻聲
或傳從軍入楚澤又聞替死如韓成遠道傳聞音不一
大要存亡事難必有時滄海人西歸除是扶桑日東出

江上短歌

三年潤州六往還慙愧未一登焦山亦如十載住南國
未到攝山真汗顏今年六月江上歸兩山在望中心違

我欲停舟少延佇東風迅發帆如飛

阿狗行

戊子

有奴阿狗辭主人主人不語潛酸辛念汝事我三十載
性雖椎魯還真醇平生衣食在園圃歲種瓜蔬繞環堵
有時從我江海行會佐榜人弄篙櫓曾將資斧數百金
付汝扁鑰試汝心久之秋毫不敢動自此財貨遂相任
汝年已壯尚無妻爲汝娶妻曰青溪妻性懶惰復多病
不任驅使嘗勃谿今年烽火連數月危城坐困薪米闕
主人尚不免饑餓阿狗豈敢愛膚髮我有兄嫂聞汝賢
久欲借汝爲耕田頃卽持錢八十緡買汝夫婦歸欣然
阿狗此時意悽惻拜辭主人淚霑臆不言犬馬有微勞
深慚未報惟蓋德阿狗阿狗知汝忠汝與今世人不同

今人叛逆爲亂賊汝則盡瘁能匪躬他時有錢仍可贖
往來只在吾門中

五月初九日作

弘光改元今日月北兵渡江薄天闕京營一騎降書飛
宮車夜半梟門發予時流寓潤州城小艇倉皇走吳越
水鄉避亂閱秋冬艱辛終不保毛髮歸來故國復三載
眼看神州皆陷沒每逢此日心暗傷愁坐書空惟咄咄
子房旣不逞博浪仲連亦未蹈溟渤所求半畝學躬耕
無處深山有巢窟浮湛末世良可羞風塵奔走空皮骨
祇應三徑掩蓬蒿敢望孤峯采薇蕨

七夕歸思

出門時與家人期七夕吾將歸東籬豈知令節彈指過

徘徊客舍中心悲客舍徘徊悲尚可驚心三月連烽火
山城欲畱畱不得江路欲行行不果此夜西風助峭寒
星河耿耿在簷端誰家少婦高樓望一縷雙針乞巧盤
今人乞巧巧已極吾生守拙拙亦力巧拙互觀更相笑
惟有離情共悽惻何年送老入深山男解牽牛女能織

富池晚泊

富池江口甘公祠神鴉千百巢樹枝客來必迎去必送
拋與祭肉飛啄之相傳此鴉來已久族類蕃衍神所祐
江頭估客欲停船望見神鴉若親舊邇來烽火亂江雲
甘公祠宇半燒焚唯有神鴉驚不去烏烏啞啞聲相聞
間者兵兒萌殺機鴉必先覺摩天飛以此彈射不能損
橫江送客終無違我來富池拜祠下仰視羣鴉鳴古瓦

斷碑零落荒草間欲考其詳罕知者祠傍有樹曰棕櫚
根幹輪囷枝扶疎山僧指點數百載石上猶存坡老書
我愛神鴉性靈異復愛棕櫚影蒼翠樹下徘徊夕陽沈
况有前賢詩可記獨怪坡咏棕櫚時曷不一及神鴉事

雷江口

鮑昭書中大雷岸李白詩中長風沙本是古人佳勝處
今人相喚名遂差長風沙爲烏沙夾大雷岸爲雷江口
不考其實訛傳訛古人佳勝復何有此地面江卽樅陽
唯我過此心徬徨若非鮑昭與李白山川那得生輝光
齊介人書至云宋玉叔客吳門念予甚切感而有

作

山東才子宋玉叔滄溟以後無其人曾游江南訪諸彥

江南諸彥皆逡巡一朝京口與我遇紵衣縞帶僅如故
把酒同登萬歲樓行吟共倚三山樹亡何白日塵沙黃
與子避地尊鱸鄉本期煙櫂窮水國可憐病骨支匡牀
久之風雨復飄散君冒兵戈歸海畔雙魚寂寂冷春江
三星耿耿望秋漢明年六翮翔九州乘興復作江南遊
逢人輒問明農子聞我饑寒嗟未休齊生書來道君意
令予俛仰發長喟乾坤納納幾人存出處雖殊心不易
初冬擬掉吳門來君舟此際開未開虎丘霜月甚可惜
安得與子大醉生公臺

荅邢孟貞江上見懷

八月我自黃州歸不知君上彭郎磯楚江遼濶坐相失
令人轉恨檣鳥飛十月重來舊京室聞君返櫂已旬日

金上集
亟呼奴子馳相聞莫似長江又相失君持一卷楚游詩
云過樅陽多所思勸我歸耕嘗苦口往往荅以東坡辭
我謝江神非得已有田不歸如江水且將醫卜混屠沽
稍可買山卽歸矣石曰湖邊數口家門前禾黍復桑麻
主人底事亦久客三年不見東籬花

廣陵同姚仙期鄧孝威飲吳園次臘梅花下

百花之長山中梅謂其能犯霜雪開梅花開時春已動
臘月梅蘂方含胎不如臘梅更孤絕窮冬乃能傲霜雪
根幹雖無古松勁芬馨頗似秋蘭烈我友吳子蕪城東
獨賞此花樹庭中門逕不許俗人到氣味自有賢妻同
虎丘姚師衣破衲廣陵鄧生披短褐爾汝俱稱物外交
要我同行意軒豁入門呼酒復呼茶蕭然環堵類山家

他人富貴足悲歎我曹貧賤還驕奢君不見臘梅花

與治五十

君年三十七我年二十三曰杵始定交聲詩播江南君
年今五十我亦三十七世運有革除交情永無失交情
久遠良足多功名未免歎蹉跎風沙倏起箭滿眼相期
采藥西山阿西山草木鍾神秀何事苦吟人太瘦試看
山中猿鶴羣瘦骨孱孱反多壽勸君加餐君勿疑四十
五十未爲衰南陽若有漢司隸扶杖旁觀尚可期

石曰行贈崔正誼明府

君不見石曰湖湖村一幅桃源圖荻花到處有漁父竹
實時能來鳳雛江南山水多靈秀幽窗終當推石曰我
昔逃名隱此間欲結茅堂未成就無端浪跡逐江雲湖

中消息嘗相聞昔年擬仿韓公子今日欣逢崔令君令
君文苑稱作者雖領簿書亦風雅尋常尚想登龍門況
受一廬棲宇下寒雲漠漠雪霏霏久客江城取道歸爲
愛湖村聊卒歲琴堂何幸瞻容輝令君雙眼如秋水自
別陽鱚與魴鯉莫疑勾漏乞丹砂匪向臨邛彈綠綺石
臼湖邊草樹香春來依舊結茅堂門前鳬雁應無數或
有王喬履一行

贈湯幼嘗之子令仔

已丑

湯生有子名令仔神氣駿爽超羣兒我昔游其師塾中
見此童蒙獨稱奇今年令仔方毀齒童蒙亦覺感知已
往往見我情最親繞膝殷勤問書理而翁孝友學道人
聲光未泄萃汝身眼看駟馬復車蓋屈指而翁纔五旬

哭從子直之

吾兒死不見其死不見吾兒見猶子猶子病時我在旁
其形枯瘠不忍視聞說吾兒病篤時其形枯瘠亦如此
傷哉天乎何不仁一門喪我兩才士二子才調各不同
一者豪放一謙冲所性雖殊雅相善翹然鶴立鷄羣中
奈何俱嬰不起疾爾年三十兒十七爾曾富貴兒長貧
爾既有子兒無室吾兄昨日爲我悲我今爲兄涕交頤
明朝江口又相送死別離兼生別離

贈孟六珩明府

小孤山北江城徵兵荒廿載人民稀近來却有神明宰
白叟黃童得所歸神明者誰出鄒魯大賢遺訓垂千古
夙昔文章號巨公今茲德化推慈母丙戌之歲秋闈開

我公應聘江東來午夜焚香告天地務求磊落嶸崎才
偶獲一卷稠人裊氣韻澄泓似秋水急呼武進張環生
此是桐城方爾止環生張令我故人乍看遂謂爾止真
兩公擊節相嘆賞交薦主者魁其倫明朝折卷非所望
兩公咨嗟復相向絕代佳人在幽谷十年不字空惆悵
公誠知我我未知逾年環生始言之野人性癖固不仕
知已恩深能勿思可憐世事同飛電聞聲相思不相見
頃來姑孰謁高僧佛座蓮花映君面彼此初未通姓名
滿堂賓客獨目成近前一語忽大笑針芥之合良非輕
須臾執手相慰勞文章有神交有道我本麋鹿合山林
君卽夔龍且泥淖浪師義學天下無親拈五色摩尼珠
與君日日來聽此勝著我冠馬上趨

宛陵雨中訪蔡四芹溪

庚寅

登嶂樓頭雲出門雙溪渡口雨翻盆似有蛟龍鬪不止
平地水深三尺渾淮西山人宛陵客終朝獨坐愁心煩
與其獨坐愁心煩何如赤脚著短褌冒雨衝泥過橋去
草堂未掩天黃昏知爾貧厨無所有新麥作醴剛一尊
卽焚枯魚酌麥醴中郎風味千古存今宵共醉且爲樂
明日陰晴誰復論

蔡邕與劉表書云焚枯魚酌麥醴欣然樂在其中

埕塘與甯山同宿胡允右宅醉後作

我思故人溯江去故人思我沿江來江渚相逢忽大笑
卽與攜手同舟迴埕影塘邊有知己明江東去復九里
不嫌索酒叩柴門况對寒花映溪水今宵爛醉君莫辭
明朝我去天一涯歸來只恐君亦返赭山重聚知何時

君家九子芙蓉下抱琴獨嘯無知者何生遠出劉公亡
泠泠哀吟向誰寫

劉伯宗何寤明寧之同邑師友也

羅溪訪詹錫卿有贈

辛卯

詹生累世山中居少年豪氣壓里閭讀書不下數萬言
飲酒乃至一石餘是時天下承平久樂事何多在林藪
一朝羣盜入巉崑苟全性命戕兩手兩手雖戕尚能持
終日作字細如絲青氍舊物那忍棄秋林闢館教羣兒
我來訪君萬山裏幽溪彷彿花源水門前粳稻露華濃
籬邊橙桂香風起置酒芳園覆綠陰東鄰二子皆同心
張旭如章明卿况有伶人奏絲竹遂令山水紛清音夜闌勸客
飲一石主人竟不飲涓滴長齋事佛有深意神情無乃
太枯寂君爲我飲我爲君歌當年樂事今如何一從鞞

鼓亂天下道途人少豺狼多幾家招飲有叢桂幾人睇
笑山之阿如何不飲空蹉跎

城西行

孺子五月瘞城西半年不到草已迷殘冬出郭一相視
朔風震蕩愁雲低山高墳小恐易失紙錢倒掛枯棠梨
日暮歸來慘不樂且呼二女相提攜二女平居聞哭慣
嬉笑亦復學人啼若母惡其聲不祥持竿喝止中心悽
風雷行贈雪田上人

壬辰

雪公新自皖口還休夏直入飯籬山山中一夜大雷雨
天崩地裂非等閒園有古樹高千尺須臾吹倒壓我壁
孤僧倚壁正酣卧碎骨奚止萬斤石此時梵剎皆欹傾
雪公閉目神不驚天明雨止掘始出恍如入定聞磬聲

我來問公顏樹下相對神情愈閒暇擊火烹泉不停手
重拈石上三生話遙指青峰天柱西故人許我田數畦
欲結茅菴寄瓢笠烈風雷雨焉能迷

張道人園居歌

今年暑熱何太酷五月中旬似三伏江邊垂柳葉欲焦
路上行人汗如浴我自姑郡來蕪關主人館舍惟一間
繩牀獨宿已偏側况復枕畔添雙鬟倉皇躡屨入山去
石上松陰可箕踞僧房一一寓皆滿欲覓幽栖向何處
飯籬山下張道人曾於僻地開荆榛斬竹編蘆葢茅屋
四山迴合皆松筠我問道入借一席道人欣然迎我入
東頭正空兩三楹君來可以恣休息明朝抱枕到中林
北窗高卧松陰森但見涼飈透絺綌豈有暑氣來相侵

道人性復知愛客每日烹茶供肴核此間安樂勿思歸
且待秋涼再區畫

顧與治白下書來却寄

四年不復到舊京舊京老友嘗寄聲頗聞君受買田累
幾至破家殞其生前歲寄書到京口勸君盍拋此田否
君言急切拋與誰譬如重病須緩醫我切爲君憂此事
病重醫微恐難治百里空勞牛馬塵三載遂無鴻雁字
昨日京口寄我書上言此累已寬舒今秋可收穀千石
除却完公尚有餘七月將歸舊京矣要我重來白門裏
老友相尋豈不懽無奈歸心在皖水江畔梅花冬復春
相期命駕訪情人若使避兵白下好還思徙宅爲比隣
喜得姚休那先生書

龔山集

卷三七言古

十九

先生高卧秋山雲幾欲來訪慙垢氛昨日遠寄一書札
其中意念何殷勤我休買孺子妾孺子妾不如文君
寧馨阿堵兩難事斯言妙絕今始聞先生書云君買妾
管川吾馬漁王一輩人責效于已試者較易耳若趙家
姊妹恐非人種蓋美人之于寧馨猶文人之于阿堵皆
世間極難得之物也
夫竊為私憂過計也

廬山訪從子密之同宿九夜臨別作歌

與爾同學十四年

自丙寅至巳卯

寒冬夜夜抵足眠當時文章

各自負豈知窮達分天淵爾仕明時露光彩時危斂曜

游東海同心那得復同牀分攜又十有四載自巳卯至壬辰眼

看二十八年過小壯幾時奈老何爾於五倫事皆畢我

無一成空蹉跎今冬訪爾廬山下重與抵足八九夜夢

中頻上紫霄峰醒來真是白蓮社

金竹坪雨雪行

城中微霰不終夕，山中大雪已盈尺。城中雪消半月餘，
山中松樹雪猶積。祇緣此地高且寒，千巖萬壑埋雲端。
老僧告我四時雨，一月曾無幾日乾。

三疊泉歌

玉川門內看三疊，飛泉噴薄由層巒。九雲屏前看三疊，
急流奔瀉在深湍。乃知世間本一物，隨人上下殊所觀。
我今更躡五峰頂，從此眼界何如寬。

龍竹歌

癸巳

吳城令公廟有二枯竹圍大尺五，宛如龍形，鱗鬣俱備，但無首耳。昔

有人于鄱湖中網得一株，詫其神異，送入廟中。祀之，越數年復有一株，浮至廟門，似欲上岸者。舟人取視，與前竹無異，長大亦相等。并祀于廟，果神物也。癸巳三月十一日子過此，見而愛之。

因作歌

昔聞竹化龍今見龍化竹羣龍見尾不見首竹亦無首
尾相屬長梢夭矯勢入雲密節糾互成龍文是龍是竹
渾不辨一雌一雄如有分我夙好奇訪其處摩挲驚喜
復驚懼古廟喧闐難久畱會須風雨雙飛去

左蠡行

小艇迎風發星渚未到揚瀾日過午榜人貪涉不肯停
黃昏必抵都昌浦俄驚狂飈自西來水聲騰沸山崩摧
更兼雷雨助其勢榜人面色如死灰急曳半帆回左蠡
冥黑奔馳二十里依稀見岸不得近沙淺曾無盈尺水
終宵漂泊蘆葦邊風波震盪誰敢眠世間平地皆好住
何事江湖年復年

賣馬行爲祝一之賦

蘭溪祝子令建昌簿書錢穀非所長性情獨嗜詩與酒
湖山花月恣徜徉一朝拂意掛冠去興味蕭然仍寒素
祇緣脚疾行不良買得一馬當徒步蠡城客久囊橐垂
食指繁衆長苦饑藜羹不飽况芻秣爭欲賣馬供朝炊
主人見馬意淒楚嗟爾玄黃瘦如許馬不能言對以臆
我與主人命同苦世間富貴唯科名但入仕途金滿籬
主亦登科宰百里半肩行李何其輕昔時廉吏人所羨
今時廉吏人所賤早知官罷廚絕煙何不居官少通變
主人悵惋復徘徊此奴牽出城東來我棄一官如敝屣
區區欸段何有哉君不見漢家驃騎千萬匹無端闌入
閼氏室

山中休夏

野性好游四時同惟有盛夏思山中所苦衣冠見熱客
不如袒裼迎涼風今年西歸自廬岳蓮花灣頭且歇脚
柴門枕簟恣高眠雖無飽飯粥亦樂

秋日漫興

四時平分秋最佳孟秋景物尤堪誇千樹欲落不落葉
數枝將開未開花秋山著雨淨如洗秋水平湖浩無涯
菰蒲茭芡聚淺渚鳬鴨鷗鷺爭晴沙山田到處收粳稻
村舍逢人話桑麻魚舟魚賤不須買酒坊酒熟頻教賒
溪山如此足娛老我獨何爲欲辭家祇緣性情好江海
八月又泛銀河查

漳湖歌贈范小范

漳湖垂釣者誰子磊落嶽崎天下士不堪牛馬走風塵

且伴鳬鷗美秋水水邊築室曰緯蕭朝爲漁人暮爲樵
煙簑雨笠自千古韎韞襦襜何所驕君不見漳湖之西
大雷岸荻花楓葉荒江畔鮑昭於此寄妹書遂令僻地
聲光燦回望漳湖多白雲向來泯沒今始聞他年漢使
求遺老舟過雷江先問君

皖口行

六日凝寒雨不絕中間爲霰又爲雪天宇沈昏飛鳥無
江波洶湧行人輟我來買舟向匡廬榜人勸我姑徐徐
揚舠須待雨雪止六日不敢開篷條浙浙寒風透窗牖
重重布被蒙身首泥塗薪米尚艱難那得餘錢復沽酒
從來雪天容易晴連陰不晴愁緒繁但令卒歲有衣褐
何苦嚴寒江上行

雷江口

停舟晚口七日多淒淒無奈雨雪何行人躁急耐不得
揚帆破雪凌風波雪花飄空朔風吼江邊行者一無有
獨我孤舟冒險艱須臾已到雷江口雷江津吏把手搖
長年三老慎勿驕此番安穩乃微幸世間幸不可屢微
建昌魏明府招飲署齋卽席作歌

三月訪君到修水君去章門百餘里荒城破寺難久留
停車一夕卽歸矣端陽星渚忽相逢舉杯慰勞情更濃
自言雲居山秀絕不讓五老香爐峰我聞此言興勃勃
重游須待新秋月秋田穫少費經營蹉跎冬仲舟始發
蠡湖雨雪何瀧瀧浹旬才得抵修江故人一見驚且喜
旋出金盤倒玉缸殷勤勸我加餐食相看俱有風塵色

只道天寒爲客苦豈知爲官更苦極前日填撫過城東
拜跪迎送雨雪中肢體凍僵陷大澤衣裳盡濕誰敢烘
今朝偷得片時暇把酒論詩竹窗下無端吏復催升堂
鞭扑誅求至中夜嗟乎本今守令靡不艱觀君風槩猶
蕭閒登臨豈礙民社事與我雪晴共上雲居山

徐園看臘梅花

菊花開罷花事窮千林萬木搖悲風臘月老梅底心性
繁英爛熳霜雪中可憐地僻罕人識孤僧引客尋幽叢
手折一枝歸旅舍寒香冷艷將無同

雲居訪晦山大師贈三十韻

甲申三月天地崩先皇龍馭奄上升普天率土皆怨痛
我曹悲憤情尤增婁東名士王元達號泣求死苦未能

救斷家務辭祖廟毅然削髮爲孤僧江南山水游已徧
乃至廬峰最高層九疊雲屏居二載千巖萬壑靡不登
書法雄俊李北海詩情淹潤王右丞義學淵邃吾不知
大要能參第一乘匡廬之西雲居山體勢蜿蜒高嶙嶙
其上古有真如寺復有明月湖光澄唐宋以來三十代
代代耆宿相師承中間佛印名最著蘇黃二李爲良朋
手植黃荆樹猶活親造碧溪橋尚稱元末始有兵燹患
本朝慶曆年復弘神廟御書十四字奎章魏煥神所憑
金粟如來及三藏頒自聖母信且徵近日鐘鼓雖寂寥
草木之氣猶鬱蒸何幸晦公來駐錫皆云此寺當中興
我夙與師相慕久都昌片札傳也曾歲寒那敢畏霜雪
穿雲蹠磴惟枯藤招提一見懽若舊雨窗話到三更鐙

談禪談詩已快絕重論往事悲不勝欲補青天無采石
欲繫白日無長繩與其羈絆塵網中腥濁臭穢良可憎
何如埋照向幽谷身心皎潔冰壺冰莫愁震旦遂長夜
天運剝復還相仍處則蹲伏類獅象出則變化齊鵬鵬
來朝別師下山去回望山頂雲煙凝他年倘晤在京闕
紫氣重瞻十二陵

崔李行

甲午

杜詩云晚定崔李交會心真罕儔
每過得酒傾二宅可淹留謂崔封

李戰也白詩云平生相見即管閑靜念無如李
與崔各是天涯為料史如何不見九江來謂李
公垂崔晦叔也夫杜白當時交游何限乃惓惓
致意于崔李二君噫亦異矣予生平不乏交游
稱知己者則崔高淳正誼李太湖漑林嘗兩至
高淳三至太湖二公待予之厚始終無間因有
感於子美樂天二詩而咏嘆之似
先獲我心者爰作短歌以紀其事

有唐詩人累千百我獨師承杜與白杜白同時人幾何

金山集

維崔與李情獨多古今風雅有神契况復俱生壬子歲
何緣崔李亦同時氣味相合長相思長相思不長相聚
會吟錦水香山句

送八弟爾孚游武昌兼寄徐莘叟

吾弟昔適楚往來蘄黃州漢江去幾許未上黃鶴樓黃
鶴樓空不如昔鸚鵡洲頭芳草碧行人過此暗傷魂况
爾風騷嗜成癖野店山橋驅寒驢言訪故人徐秘書秘
書高義夙相洽楚江吟眺今何如醴酒雖然稱上客飄
零琴劍終非策無情白髮暗催顏有用黃金莫輕擲歸
贖城南數畝田妻耕子耨終殘年

戲荅友人借書

古人借書餉一甌及其還書亦如之世間好書難得讀

以酒酬之尚未足今人字義明昧間有書不借借不還
借書還書癡何有不借不還良可醜

詩云借書一紙還書一紙
瓶酒器也

今人誤作
癡故云

老姑行爲姚姊夫人七十壽

吾家先世有老姑髫年未嫁亡其夫竟以處子終漆室
壽介八旬貞不渝三百年間風未墜姚吳二姊能相繼
二姊十七守貞同次第皆登七十歲清芬才調更絕人
詩文秀潔無纖塵書法直追王子敬繪事不讓李公麟
曾集宮闈詩一帙部分邪正意凜慄大書石碣表荒山
預築佳城待同穴凡稱婦職仰夫子吾姊所杖不在此
空閨寂寂老朱顏苦節煌煌照青史方今節義何浸淫
松栢衰頽蕭艾深世人雖不好松栢果見虬龍誰不欽

譬如吾家老姑去已久閭巷高名並山斗中間簪紱豈不多悉與草木同腐朽吾姊操行復嶢峴三老姑名應不刊浮榮奕葉等閒事唯有斯人良獨難吁唯有斯人良獨難

雙松歌爲楊嘉樹尊人壽

楊生手持一幅雙松圖言歸壽其二親六十俱問誰作者釋無可此意便與今人殊今人所好惟富貴乞言鮮不爭華蔚楊生轉好出世人當是若翁平日家訓有獨異若翁高士本南州逃名亦似韓伯休偶因買藥至桐子綬戀遂家此山陬暮年始誕二雛鳳長離五色能驚衆欲飛不飛鳴不鳴會看東海晨曦動楊生此意人罕知蓬門菽水聊棲遲三公五鼎有時盡千霜不改青松

枝所以旣索竹關上人畫又索淮西山人詩

山谷寺短歌

乙未

昔有二老天監問一錫一鶴爭此山我嘗疑其爭似罔
到此方悟非等閒卓錫一峰高似笋更有浮屠在山頂
四山環抱僅餘門門外吳塘美澄影其東便是白鶴泉
左慈丹竈遙相連形勝雅不遜卓錫舒州仙觀名千年
我來三月重三日僧房道院俱蕭瑟惟有流泉似昔時
潺潺仍自溪中出

彰法山經橋公故居

古人我愛孫伯符弱冠義兵起東吳同年遂有周公瑾
奮其智勇成雄圖分則君臣義兄弟併與橋家作嬌婿
二女才華誠絕人何處能尋此伉儷可憐伉儷不同老

孫郎早世周郎天海邊精衛恨茫茫枝上啼鵲聲悄悄
我今彰法山下過路人猶指舊山阿雄圖艷質俱銷歇
惟有荒臺永不磨

四月四日龍河阻雨

四月一日至四日田家於此候陰晴一二三日晴則稔
今年三日俱晴明四日宜雨雨果大今秋農事端有成
吾鄉苦遭三歲旱見說豐稔先怡情但教塲圃有餘粒
客路棲遲無嘆聲

四日雨農有餘騎
木驢者謂踏車也

泣象行

有象有象西南來言從楚塞之燕臺縣官郊迎十里外
閭巷盡閉城門開居人看象家家出道傍暗數十三匹

高如屋脊色如灰形勢威猛良可休中有一象獨淚流
驅之不行屢回頭諸象亦似慘不樂強行數步還復休
借問此象何由得象奴欲語先悽惻此獸不與凡獸同
曾受本朝大官職一自兩都陵谷遷□統却在西南天
羣象當關爭禦敵戎馬不敢窺黔滇頃者將軍貴公子
輕身挑戰陷重壘將軍舐犢不勝情車輦金銀來贖取
北兵揺手不受金會須巨象始稱心將軍痛子不得已
遂驅此象來江潯豈知人情故叵測旣獲其象子復賊
將軍憤極大舉兵電閃雷轟在頃刻北兵大敗不可支
水深河廣爭渡之人馬溺死凡數萬僅餘此象先驅馳
象本不願從逆節無奈爲人所羈紲象奴雖賤南方人
屈膝北人憤所切燕山楚水路漫漫晝行夜卧同辛酸

其中老象心更苦雙眼常流淚不乾我聽斯言發長喟
世間物各有忠義雀猶報德魚感恩魁然巨物何足異
君不見供奉猴跳擲欲上朱溫頭又不見舞牀馬怒視
祿山不肯下爾象有力逾千鈞何不發狂奮迅奔絕塵
任渠萬馬追莫及何爲低頭垂鼻空含辛

白門三子行贈陳翼仲張介人鄭元白

昔余授易冶山園一時英俊從者繁其中五子最傑出
臭味相洽無間言忽逢世變各分散重來白下傷余魂
蔡盛溘焉化朝露惟陳張鄭三子存三子匪獨擅文苑
更能猛力窮詞源才名藉藉震京邑皆云此出淮西門
老我因之增氣色緘口不言道已尊試問別來何所得
爭出其製相討論或如蘭若翡翠立或如碧海鯨魚翻

風塵豈合淹此物眼見六翮當高騫陳生更念客衣冷
脫裘贈我霜天溫今人君父誼且薄誰能不忘師友恩
感此長吁飲一斗懷抱淒絕吟聲吞酒闌歌罷出門去
悄悄月明秋樹根

書汪五河母行狀後

汪生向我聲烏烏爲言有母鬻阿孤十六年間勤且瘁
將荼畜租良不易兒幸成立能文詞黽勉祿養自有時
豈知風水不相待菽水正歡先見背此身難報罔極恩
敢乞名言表墓門嗟乎今人所志在薰灼倫理之間鮮
不薄汪生至性痛所親他年豈負君友人

訪林青仲不值畱此兼悼令兄儲乙

瓦官閣西曾結隣與君兄弟情最親一聞笳鼓我歸去

蔣山回首長酸辛八年重渡秦淮水舊交落落晨星矣
猶向城隅訪二林雁行中斷忽千里君又讀書銅井山
含悽作字付雙鬟只恐君來我欲別人生會合何其艱

揚州遇鄧孝威有作

丙申

八年前作廣陵游一時聚集皆名流君齡未壯便隱逸
賦詩贈我深相投亡何風雨各飄散我去山中君海畔
忽聞驅馬入京師定知采筆干霄漢聲名籍甚公卿間
掇取科第如等閒雖曰從軍不肯嫁木蘭仍以處子還
適我避讎來水國舊友凋零空嘆息豈料君從北地歸
古寺同棲正歡劇日夜相過不厭頻狂吟豪飲任天真
殘冬且莫輕離別直待關中孫豹人

梁仲木招同鄧孝威飲瓊華觀醉後作歌兼懷令

弟公狄

梁公五十鬚皓白其鬚雖白心則赤少年出入戎馬場
雄文欲勒燕然石蹉跎壯歲不得志南游且作諸侯客
忽逢世變神愈傷秋水蒹葭渾浪跡君家兄弟本燕人
墳墓田園在京國其性乃如鷓鴣鳥飛必向南不向北
以此流落江淮間縱酒沈冥人不識與余相慕二十年
今朝忽喜見顏色瓊花觀中促沽酒霜天痛飲懽無極
況有鄧生同氣人話到京師淚沾臆侵晨便欲秦郵去
十日仍來邗水側令弟藏身射陽湖潛螭不見更奇特
我欲從之煙水迷非君共艇求安得

王雷臣侍御招同沈仲連李叔則梁公狄夜集黍
酒宋薨喜而作歌

淮酒何物浪得名其味重濁少輕清五加皮甜苦蒿苦
除此薄劣不足評王公燕市文章伯持斧江南遂卜宅
生憎淮酒不沾唇拒黍攜來自醞藉酒成冲澹復辛香
飲之不異醍醐漿千鍾百榼渾未惜時時召客來高堂
我謁王公霜氣肅適有三賢先在屋薄言取酒禦風寒
涓滴纔濡春滿腹况乃宋薺形製奇古色斑剝如鼎彝
衆手傳觀互相賞循環斟酌誰敢辭如此杯罌如此酒
今宵爛醉良非偶主人愛客不嫌頻尚許雪天傾數斗

淮瀆救

是日范廉生主社賦此

淮瀆淮瀆故有神今古廟立淮之濱通江導河入於海
祀同五岳康我禋定陵四十有八載天下雍熙俗未改
曾頒道藏賜名山特遣中官蒞淮海手捧龍文敕一通

煌煌天語在其中延齡不借長生藥致治惟敦黃老風
道書千卷藏於此上有漆函函睿旨春秋又復四十年
臣民曷敢輕開視今冬有客淮南游經過瀆廟聊彞猶
仰首神明問童子宛見敕書居上頭再拜焚香復盥手
取敕開看咨嗟久朱文寶篆尚鮮明黃絹金泥絕塵垢
我黨俱是山澤癯每逢舊物淚沾襦鍾山松栢且凋落
此敕不動神所扶是日恰逢陽長日把臂同歸范生室
主人進酒客賦詩賦詩無如淮瀆敕

韓侯兒

是日陳階六丘季貞主社賦此

韓侯之族世所悲韓侯有兒人莫知我今痛飲淮陰市
請爲君歌韓侯兒侯昔鍾室銜冤日小兒三歲誰能匿
有客毅然竊召逃密以情探蕭相國相國聞之驚且憂

爲言關隴不可畱作書授客使入海南粵趙佗堪與謀
趙佗夙與蕭韓善養兒成人延一綫去韓之半改姓韋
子孫漸繁滿鄉縣因之世世爲土官魏晉以後休隱瞞
蕭相前書趙王冊刻諸金石永不刊韓襄毅公曾有說
乍聞此事歎奇絕其客姓名雖不傳自與程嬰比風烈
釣臺之下淮水奔我來泊舟先愴魂千古英雄有本色
死生貴賤何足論要知呂亡漢亦滅韓侯血食至今存
題宋射陵疏枰卷

於陵仲子辭三公爲人灌園溜水東灌園何關盛德事
千載以下欽高風鹽城宋子居澥口平生自負釣鰲手
江澥橫流那得施且作田間抱甕叟其畦歷落如楸枰
露葵霜薤長滋榮君因種疏悟碁理眼前黑白誰輸贏

獨惜世無張德遠何人記憶蘇雲卿

蓮池種竹歌 丁酉

二月之晦前三日奉吾母柩歸攢室室在山阿湖水邊
舊種青松高且密祇緣東北隅少虧秋冬恐受朔風吹
欲補以松長不及皆云種竹深相宜隣村况有湘妃竹
紫點黃斑麗青玉冒雨移來十數竿千枝萬葉仍相續
雨晴日出影蕭蕭又恐風吹根動搖植木爲闌結繩縛
提甕汲水時時澆我母有靈竹皆活其葉微乾根不撥
根邊帶笋未經鋤今歲還期笋當發明年竹母生孫枝
我母之孫尚無期兒今避讎出門去分付園丁好護持
既不許兒童折又不許牛羊嚙竹身多少淚痕斑盡是
孤兒眼中血

負版行

數年不到三山街今春偶到多感懷不知是何大書冊
路傍堆積如蘆柴行人紛紛來買此不論何書只秤紙
官價每斤錢七十多買少買隨人耳借問此是何版圖
荅云出自玄武湖天下戶口田畝籍十年一造貢皇都
玄武湖心絕炊爨永無火患及鼠患洪永至今三百年
收藏不知幾千萬一從世變陵谷新此圖廢閣空埃塵
有司上言請變價聽民自取輸官銀官召吏人估其直
十四萬金可立得富民爭買入私家零賣與人取微息
有一老翁立路傍俯首見之神暗傷曾爲州掾寫此冊
一字錯誤憂徬徨豈知今日廢無用口不敢言心自痛
也買一冊負之歸看是何年何地貢其中戶口久凋殘

田畝荒蕪不忍看若逢魯國驅車叟悲軾而趨鼻更酸
二客行贈萬遐客瞿客

徐州不見萬年少山川冷落無光輝繼起者誰有二客
阿咸阿戎其庶幾大客魁岸如岳立小客溫潤亦如璧
河邊舊宅已三世架上藏書仍十尺我與年少爲故人
車過腹痛鼻酸辛先見小客意頗慰後見大客情愈親
招我夜集餅花谷香醪一甕冬所蓄懽腸不覺醉爛熳
清音况復勝絲竹我爲君飲君爲我歌昏夜焉能再渡
河書堂吟榻且借宿來朝此地還婆娑彭城酒伴諒不
乏未若萬家兄弟旨且多

中秋夜吳中黃招同諸子賞月作吳郎行

戲馬臺東奎山西吳郎此地有幽棲胸中淵藪世莫測

門外名儒時相攜我游彭城暑未殘與君一見如舊懽
草堂每到必需醉還訂中秋月共看是日恰逢天氣爽
晚來風月愈清朗主人移席當星漢羣公列坐皆吾黨
毛生遠來自京峴徐翁父子吳門彥萬家兄弟俱豪賢
張段風流和小阮更有紅裙李墨仙言詞辨惠態嫣然
痛飲千鍾不辭醉嬌歌一曲尤可憐杯斝交馳疾若飛
夜深涼露濕人衣三更已盡興未盡踏月聯鑣送我歸
我寓城東大河口牀頭尚有一罌酒入門驚見龔開畫
美人與客皆稽首君問此畫不忍說且復開尊玩明月
美人醉倒喚不醒蟾墜鷄鳴客始發因憶子瞻居徐州
中秋見月懷子由舒鄭頓趙四好友一時離散中心愁
爭如我輩今日情良朋令節樂事并他年應記作佳話

爲君先賦吳郎行

道上遇陳伯璣有感而作

白門雨雪歲將暮我尚羈遲未歸去君胡復自于湖來
道上相逢太匆遽爲言旅況不如前賣書賣墨過殘年
書是平生手所閱墨亦手造精且堅割愛與人非得已
俗人見之猶不喜仍攜書墨返于湖我輩奇窮一至此
送君登舟君勿悲聞有艷妾生佳兒設令我有艷妾生
佳兒賣書賣墨甘如飴